

NË EMER TË POPULLIT

GJYKATA THEMELORE NË PRISHTINË - Departamenti i përgjithshëm – Divizioni Penal, me Gjyqtarin e vetëm gjykues Rrustem Begolli, zyrtaren ligjore Sanije Troshupa, duke vendosur në lëndën penale ndaj të pandehurit M.B nga R, për shkak të veprës penale Falsifikimi i dokumentit nga neni 398 par.1 të KPRK-së, duke vendosur lidhur me Aktakuzën e Prokurorisë Themelore në Prishtinë - Departamenti i Përgjithshëm PP.II.nr.4032/2015, dt.22/12/2016, dhe kërkesën për shqiptimin e urdhrit ndëshkimor, pa mbajtjen e shqyrtimit gjyqësor, me datë **06/03/2017**, merr këtë:

A K T G J Y K I M

PRANOHET kërkesa e Prokurorisë Themelore në Prishtinë, Departamenti i Përgjithshëm PP.II.nr.4032/2015, dt.22/12/2016, kjo Gjykatë i jep këtë;

URDHËR NDËSHKIMOR

Të pandehurit:

M.B, nga i ati B, e ëma S, e gjinisë B, i lindur me datën *data e lindjes*, në K, tani me vendbanim në fshatin Q, Komuna e R, ka të kryer shkollën e mesme, i gjendjes së varfër ekonomike, me passaport të Kosovës *numri pasaportes*, shqiptar, shtetas i Republikës së Kosovës.

ËSHTË FAJTOR

SEPSE: Me datë 18/02/2015, i pandehuri ka tentuar të udhëtojë nga Aeroporti Ndërkombëtar i Prishtinës “Adem Jashari” për në Veron – Itali, në kontrollin e dokumenteve në nisje në aeroport për të kaluar kufirin ai ka përdorur – prezantuar pasaportë të Kosovës dhe leje qëndrimin në Itali, me nr. serik *numri serik*, e që nga polici në kontroll është dyshuar se dokumenti i prezantuar nuk është në rregull dhe pas verifikimit ka dal se i njëjti i posedon tiparet e sigurisë sipas teknologjisë së prodhimit si: teknika e printimit, reaksioni nën rrezet UV (ultraviolet), shenja ujore dhe fije sintetike janë të integruara në letër, numër serik është në shtypje të lartë, mirëpo gjatë ekspertimit të bërë është identifikuar se në dokumentin ka ndërhyrje me fshirje kimike të data e validitetit, ka falsifikim të pjesshëm.

- **Më këtë ka kryer veprën penale Falsifikimi i dokumentit nga neni 398 par.1 të KPRK-së.**

Andaj gjykata në kuptim të neneve 4, 41, 42, 43, 46, 62, 73 të KPRK-së, si dhe në bazë të nenit 365 dhe nenit 495 të KPPRK-së, të pandehurit i :

SHQIPTON

DËNIM MË GJOBË në shumë prej **200.00 € (dyqindë euro)**, të cilin dënim duhet ta paguaj në afat prej 15 ditësh nga dita e plotfuqishmërisë së aktgjykimit.

Nëse i pandehuri nuk e paguan gjobën në afatin e caktuar, Gjykata do të veprojë në bazë të nenit 46 të KPRK-së, deri në zëvendësimin e dënimit me gjobë me dënim me burgim në kohëzgjatje prej 10 (dhjetë) ditëve, duke llogaritur për çdo ditë të kaluar në burg shumën prej 20 (njëzetë) €.

Në mbështetje të nenit 62 par.2 pika 2.6 të KPRK-së, krahas dënimit kryesor, të pandehurit i shqiptohet dënimi plotësues – konfiskimi i përhershëm i Lejës së qëndrimit Italian, me numër serik P830942, i lëshuar në emër të pandehurit, e të cilën e kanë sekuestruar përkohësisht Stacioni Policor Kufitar – Aeroporti Ndërkombëtar i Prishtinës.

I pandehuri obligohet që ti paguaj të gjitha shpenzimet e procedurës penale sado që të jenë ato sipas llogarisë së bërë në arkë të gjykatës, kurse në emër të paushallit gjyqësorë të paguaj shumën prej 20€ (njëzet euro), në afat prej 15 ditësh nga dita e plotfuqishmërisë së këtij aktgjykimi.

Kërkesë pasurore juridike nuk kishte.

A r s y e t i m

Prokuroria Themelore në Prishtinë - Departamenti i Përgjithshëm, ka parashtruar Aktakuzën PP.II.nr.4032/2015, dt.22/12/2016, po ashtu me të njëjtën datë është parashtruar edhe kërkesa për shqiptimin e urdhrit ndëshkimor, kundër të pandehurit M.B, për shkak të veprës penale Falsifikimi i dokumentit nga neni 398 par.1 të KPRK-së.

Gjykata shqyrtoj Aktakuzën dhe kërkesën për shqiptimin e urdhrit ndëshkimor dhe gjeti se Aktakuza dhe kërkesa janë të bazuar në bazë të nenit 495 të KPPK-se, gjeti se janë plotësuar kushtet nga neni 493 i KPP-ës, që pa u mbajtur shqyrtimi gjyqësor të merr vendim për urdhër ndëshkimorë si në dispozitiv, pasi që nga shkresat e lëndës vërtetohet se ka prova të mjaftueshme, të cilat vërtetojnë fajësinë e të pandehurit se ka kryer veprën penale e cila i vihet në barrë sipas Aktakuzës së Prokurorit të Shtetit.

Gjykata, vlerëson se në rastin konkret ekzistojnë provat të cilat janë të mjaftueshme për të vërtetuar fajësinë e të pandehurit, se ka kryer veprën penale për të cilën ngarkohet, sipas aktakuzës së prokurorisë, kjo vërtetohet nga provat si vijojnë dhe atë: nga kallëzimi penal i policisë me nr. rasti 2015-YA-0036, dt.10/07/2015, raporti i ekspertizës nga sektori për ekspertim të dokumenteve dhe dorëshkrimeve me numër referues AKF/2015-2093/2015-1776 e datës 05/06/2015, procesverbali mbi intervistimin e të dyshuarit M.B e datës 18/02/2015, vërtetimi mbi sekuestrimin e përkohshëm të sendeve e datës 18/02/2015, si dhe provat tjera nga shkresat e lëndës, të gjitha këto vërtetojnë veprimet në kuptim të veprës penale me të cilën akuzohet i pandehuri.

Sipas KPRK-së, për veprën penale Falsifikimi i dokumentit nga neni 398 par.1 të KPRK-së, dënimi për këtë veprë penale është se kryerësi dënohet me dënim me gjobë apo burgim deri në tre (3) vjet.

Gjykata në përputhje me nenin 73 të KPRK-se, me rastin e caktimit të lartësisë së dënimit me gjobë, vlerësoj rrethanat në matjen e dënimit, duke vlerësuar se një dënim i tillë është adekuat dhe është i përballueshëm në raport me gjendjen e tij ekonomike dhe me këtë dënim do të arrihet qëllimi i dënimit, i cili parashihet me nenin 41 të KPRK-ës dhe se i pandehuri do të përmbahet dhe do të ketë sidomos kujdes të shtuar në të ardhmen të mos bie ndesh me ligjin.

Vendimin mbi shpenzimet e procedurës penale dhe paushallin gjyqësor, gjykata e mori konform nenit 450 të KPP-ës.

Vendimi mbi konfiskimin e sendeve u mbështet në nenin 62 të KPRK-së.

Nga theksimet e theksuara si me lartë u vendos si në dispozitiv të këtij aktgjykimi

GJYKATA THEMELORE NË PRISHTINË
Departamenti i Përgjithshëm – Divizioni Penal
P.nr.5531/2016 dt.06/03/2017

Zyrtarja ligjore
Sanije Troshupa

Gjyqtari
Rrustem Begolli

Këshilla Juridike: Kundër këtij aktgjykimi pala ka të drejtë kundërshtimi, në afat prej 8(tetë) ditësh, nga dita e pranimit, kundërshtimi i parashtrohet kësaj gjykate.